

Rhaglen Diwygio'r GDC yng Nghymru Diweddariad ar y Rhaglen - Hydref 2022

Rhennir Diweddariadau ar Raglen Diwygio'r Gwasanaeth Deintyddol Cyffredinol (GDC) bob chwarter, er mwyn darparu gwybodaeth gyfredol am waith y rhaglen a chyfleoedd ar gyfer hyfforddiant a chyfathrebu ac ymgysylltu parhaus.

Gofynnwn i chi sicrhau bod y diweddariad hwn yn cael ei rannu gyda phob aelod o'ch tîm deintyddol, gan fod y wybodaeth ynddo yn berthnasol i bob rôl a chyfrifoldeb.

Digwyddiadau Ymgysylltu Rhithwir Medi 2022

Cynhaliwyd digwyddiadau ymgysylltu mis Medi yn rhithwir ar 26, 27 a 28 Medi 2022, lle y gwnaethom barhau i wrando a rhannu gwybodaeth am ddata a chynlluniau cychwynnol ar gyfer 2023/24 a thu hwnt. Mae adroddiad y digwyddiad ar gael yma.

Mae rhestr o Gwestiynau Cyffredin yn cael ei llunio ar hyn o bryd mewn ymateb i rai o'r cwestiynau/ymholiadau a gododd yn ystod y digwyddiadau. Bydd hon yn cael ei chylchredeg cyn bo hir.

Cynhelir y digwyddiadau nesaf ar 24/25 Ionawr 2023 a bydd y manylion ar gael cyn gynted â phosibl.

Rydym fel arfer yn cyfathrebu'r digwyddiadau hyn drwy maxcourse, diolch i gysylltiadau yn Addysg a Gofal Iechyd Cymru (AaGIC). Os nad ydych wedi cofrestru, edrychwch yma: www.maxcourse.co.uk/walesdent

Rydym hefyd yn gofyn i gysylltiadau yn y byrddau iechyd rannu'r manylion ar gyfer cofrestru – diolch!

Bwrdd Rhaglen Diwygio'r GDS - Grŵp Goruchwyliaeth Strategol Deintyddol

Cynhaliwyd cyfarfod diwethaf y Grŵp Goruchwyliaeth Strategol ar 22 Medi 2022. Roedd y prif bwyntiau trafod yn cynnwys y canlynol:

- Mae'r mesurau perfformiad ar gyfer 2022/2023 yn cael eu tracio
- Mae data cyfredol a hanesyddol yn cael eu modelu ar hyn o bryd i helpu i ddatblygu metrigau ar gyfer y contract yn y dyfodol
- Mae gwerthusiad o'r Egwyddorion Gofal yn cael ei gynnal (gweler yr adran ar Egwyddorion Gofal isod am ddiweddariad ar y canlyniadau)
- Mae gwaith yn parhau ar gyfathrebu â'r cyhoedd a'r proffesiwn
- Mae ffrwd waith newydd yn cael ei sefydlu ar y Rhaglen – WS4: Ymgysylltiad proffesiynol. Bydd y ffrwd waith hon yn cynnwys cynrychiolaeth gan Ddeintyddion, Gweithwyr Proffesiynol Gofal Deintyddol, Technegwyr Deintyddol, Technegwyr Deintyddol Clinigol a NHSBSA. Y nod cyffredinol yw sicrhau ymgysylltiad a chynrychiolaeth broffesiynol yn unol â chynlluniau gwaith y Rhaglen Ddiwygio a bydd gwybodaeth yn llifo'n uniongyrchol rhwng y ffrwd waith hon a Swyddfa Prif Swyddog Deintyddol Cymru.

Egwyddorion Gofal – Pydredd Dannedd a Chlefyd Periodontol

Dosbarthwyd holiadur i benderfynu sut y gellir gweithredu'r Egwyddorion Gofal yn ymarferol. Mae'r ymatebion yn cael eu coladu ar hyn o bryd. Cafwyd adborth cadarnhaol, a'r prif faterion a godwyd oedd sut y bydd hyn yn effeithio ar brosesau hawlio mewn contract GIG newydd, pwysigrwydd cyfathrebu â chleifion a sicrhau bod gweithlu digonol ar gael i hyrwyddo 'cymysgedd sgiliau'. Adolygwyd yr Egwyddorion Gofal hefyd gan y Cyngor Iechyd Cymuned, a oedd hefyd yn gadaarnhaol am y llwybrau. Byddant hefyd yn cael eu trafod mewn cyfarfod gweithdy arfaethedig gyda rhanddeiliaid allweddol o'r Gwasanaethau Deintyddol Cyffredinol.

Cyfathrebu â'r cyhoedd – gan Lywodraeth Cymru

Mae Swyddfa Prif Swyddog Deintyddol Llywodraeth Cymru wedi bod yn parhau i weithio ar gyfathrebu â'r cyhoedd a'r pecyn cymorth Gofal Sylfaenol ar gyfer yr ymgyrch [Helpwch Ni i'ch Helpu Chi](#) ac mae ar gael yma. Mae'n cynnwys asedau ar gyfer sianeli cyfryngau cymdeithasol. Mae dolenni i ffeiliau 'Dropbox' wedi'u cynnwys yn y PDF. Fel arall, gellir cyrchu asedau drwy: [WeTransfer](#).



2022-08-31 HUYH
NHS toolkit CYM.pdf

Am ragor o wybodaeth a chyngor ar ddefnyddio'r asedau hyn, cysylltwch â hsscomms@gov.wales

Cyflawni

- Wedi'i arwain gan y Prif Swyddog Deintyddol

- Wedi'i gefnogi gan yr ymgyrch '[Helpwch Ni i'ch Helpu Chi](#)'

Gellir dod o hyd i fanylion a dolenni i ddeunyddiau cyfathrebu â'r cyhoedd cyfredol Llywodraeth Cymru ar wefan PCOne.

Cymorth ar gyfer Hyfforddi a Datblygu'r Gweithlu Deintyddol

Mae AaGIC yn darparu addysg a hyfforddiant i ddatblygu, siapio a chefnogi'r gweithlu deintyddol yng Nghymru.

Cynhaliwyd Cynhadledd Flynyddol Tîm Deintyddol AaGIC ar 14 Hydref. Daeth dros 130 o gynrychiolwyr ynghyd i drafod 'dewisiadau', yn ein bywydau proffesiynol ac o ran y dewisiadau y mae cleifion yn eu gwneud.

Bydd ein Harweinydd Hyfforddi Nyrsys Deintyddol newydd yn ei swydd erbyn diwedd mis Tachwedd. Bydd yr unigolyn hwn yn datblygu, yn darparu ac yn goruchwyllo rhaglen hyfforddi nyrsys deintyddol o ansawdd uchel ar gyfer AaGIC (Diploma NEBDN). Bydd y Diploma yn dechrau yn 2023, a bydd y broses recriwtio, dethol a gwneud cais ar gyfer nyrsys deintyddol dan hyfforddiant yn dechrau ar ddiwedd y flwyddyn. I gael rhagor o wybodaeth am y cwrs cysylltwch â Bethan Withey - Swyddog cymorth hyfforddi nyrsys deintyddol (Bethan.withey2@wales.nhs.uk)

Mae ein rhaglen cyrsiau'n parhau am weddill 2022. Mae lleoedd ar gael ar 16 Tachwedd ar ein cwrs dysgu seiliedig ar waith Gwneud i Waith Atal Weithio'n Ymarferol (MPWiP) ar gyfer deintyddion i gefnogi nyrsys deintyddol i ymestyn eu sgiliau i gefnogi cleifion i gynnal iechyd y geg.

Mae uchafbwyntiau eraill y cwrs yn cynnwys Cynaliadwyedd mewn Deintyddiaeth ar 7 Rhagfyr, a diweddariad ar Dawelu Ymwybodol 9 Rhagfyr. Mae'r ddau ddigwyddiad hyn ar-lein. I archebu ewch i [Adran Ddeintyddol Ôl-raddedig, AaGIC – Rhestr o gyrsiau \(maxcourse.co.uk\)](#)

Mae ein tîm o Addysgwyr Deintyddol a neilltuwyd i bob un o'r Byrddau Iechyd ar gael i gefnogi timau gyda phrosiectau gwella ansawdd ac adolygiadau gan gymheiriaid i ddangos tystiolaeth o ymgysylltu â gwella ansawdd parhaus. Gall prosiectau gynnwys ystyried mentrau sy'n ymwneud â mabwysiadu strategaeth wyrddach a mwy cynaliadwy wrth ddarparu gofal i gleifion; edrych ar brosesau i gefnogi cynyddu mynediad er mwyn gallu gweld a gofalu am fwy o gleifion; neu archwilio cymysgedd sgiliau wrth ddarparu gofal i gleifion. Mae cyllid llawn ar gael ar gyfer prosiectau, a gallant gael eu harwain gan Weithiwr Gofal Deintyddol Proffesiynol yn ogystal â deintydd.

I gael rhagor o wybodaeth ac i wneud cais am hyfforddiant neu ymweliad â'r practis ar gyfer unrhyw agwedd ar Wella Ansawdd uchod cysylltwch â HEIW.DentalQI@wales.nhs.uk.

Diweddariad ar Awdurdod Gwasanaethau Busnes y GIG (NHSBSA)

Mae'r gwaith canlynol yn cael ei ddatblygu, a byddwn yn parhau i ddarparu diweddariadau wrth i'r gwaith fynd rhagddo:

Digwyddiadau ymgysylltu allanol. Mae cydweithwyr NHSBSA wedi bod yn mynychu cyfarfodydd ymgysylltu allanol i roi cymorth i'r proffesiwn o ran hawlio FP17W, gwallau hawlio a phwysigrwydd cyflwyno hawliadau'n brydlon.

Gwelliannau i'r gyfradd gwallau. Rydym wedi bod yn gweithio y tu ôl i'r llenni i fonitro a gwella gwallau hawlio a chefnogi practisau gyda gwallau wrth gyflwyno ffurflenni. Rydym yn hapus i gadarnhau bod nifer y gwallau gyda hawliadau wedi bod yn lleihau ers mis Ebrill. Byddwn yn parhau i weithio gyda'r holl gyflenwyr Rheoli Practisau Deintyddol a chithau i wella ansawdd y data. Os oes angen unrhyw gymorth arnoch chi bydd ein [Sylfaen wybodaeth](#) a'n [Desg gymorth](#) yn fwy na pharod i'ch cynorthwyo.

Uwchlwytho Data Holiadur Cleifion i eDEN. Hyd yma, rydym wedi cynnal arolwg o dros 45,000 o gleifion ac wedi cael ymatebion ar gyfer dros 300 o gontractau. Ar yr amod bod NHSBSA yn cael cyfeiriadau e-bost neu rifau ffôn symudol ar gyfer eich cleifion, byddwn yn cynnal arolwg o gleifion ar hap ar gyfer eich contractau. Pan fydd claf yn dewis peidio â darparu rhif ffôn symudol neu gyfeiriad e-bost ar gyfer arolwg, byddwn yn anfon arolwg papur ato. Os na fydd claf yn nodi nad yw am i NHSBSA gael ei gyfeiriad e-bost neu rif ffôn symudol, mae'n bwysig bod y wybodaeth hon yn cael ei rhannu drwy eich cais.

Diweddariadau eDEN. Rydym wedi gwneud rhai newidiadau i'r dangosfyrddau yn [eDEN](#).

Mae data canol blwyddyn ar gael fel tab ychwanegol. Mae hwn wedi'i gynllunio i gael ei allforio'n hawdd fel taenlen Excel neu PDF. I allforio'r data, defnyddiwch yr olwyn fach yng nghornel dde uchaf sgrin y dangosfwrdd.

Ar gyfer Byrddau Iechyd Lleol (BILI), gellir dod o hyd i ddata canol blwyddyn ar gyfer pob contract ar Ddangosfwrdd Data Cymru.

Bydd data farnais fflworid ar gyfer plant 3 i 17 oed nawr yn cyfeirio at driniaeth ar gyfer Bandiau 1, 2, a 3 yn unig.

Mae eitemau newydd wedi'u hychwanegu at ddata'r Set Data Clinigol (CDS) ar y dangosfyrddau canlynol:

- Dangosfwrdd Deintyddiaeth GIG Cymru i Ddarparwyr
- Dangosfwrdd Deintyddiaeth GIG Cymru i Ddarparwyr (BILI)
- Dangosfwrdd Deintyddiaeth GIG Cymru i Ddarparwyr (Cymru)

Gallwch ddod o hyd i'r eitemau CDS newydd o dan y tab 'Data Gweithgaredd' ym mhob dangosfwrdd.

Fel bob amser, os oes gennych unrhyw ymholiadau, cysylltwch â Dental Insight yn dentalinsight@nhsbsa.nhs.uk

Gofal Sylfaenol Un

Ar hyn o bryd rydym yn ailddylunio tudalennau deintyddol y wefan Gofal Sylfaenol Un.

Mae'r wybodaeth gyfredol ar dudalennau Rhaglen Diwygio'r Gwasanaeth Deintyddol Cyffredinol yn cynnwys:

- Pwy sy'n cymryd rhan (pwy yw pwy)
- Strwythur a Threfniadau Llywodraethu'r Rhaglen
- Atal a Gofal o Ansawdd
- Data a Thechnoleg Ddigidol
- Y gweithlu
- Diwygio'r Contract
- Cyfathrebu ac Ymgysylltu
- Digwyddiadau'r Rhaglen
- Arloesedd, Arfer Da a Rhannu Syniadau
- Adnoddau ar gyfer Practisau
- Bwletinau, Cylchlythyrau ac Adroddiadau
- Cysylltu â Ni

Os oes unrhyw beth arall yr hoffech ei weld yma, rhowch wybod i ni!

Cymryd rhan

Dweud Eich Dweud

Mae ymchwilwyr o Brifysgol Bangor yn cynnal gwerthusiad annibynnol o'r rhaglen ddiwygio. Hoffent ddiolch i'r holl dimau practisau sydd wedi cynnig siarad am eu profiadau. Mae ganddyn nhw ddiddordeb o hyd mewn siarad â phractisau o Hywel Dda (dros y ffôn neu drwy Teams). Ni fydd hyn yn cymryd mwy na 30 munud. Fel arwydd o ddiolch, bydd y tîm ymchwil yn cynnig taleb siopa gwerth £40.

Os hoffech gymryd rhan, cyflwynwch eich manylion drwy'r ffurflen ganlynol: <https://forms.gle/ivbYK7HK5YGdT7pP8>

I gael rhagor o wybodaeth cysylltwch â'r arweinydd ymchwil, Lorelei Jones lorelei.jones@bangor.ac.uk

Rydym yn croesawu adborth a chwestiynau gan **holl aelodau** y tîm deintyddol. Efallai nad oes gennym yr holl atebion ar hyn o bryd, ond rydym yn casglu'r cwestiynau ac yn eu defnyddio i lywio ein rhaglen a'n deunyddiau cyfathrebu (e.e., dogfennau Cwestiynau Cyffredin a digwyddiadau ymgysylltu). Felly daliwch ati i ofyn cwestiynau a rhoi eich adborth i ni – cysylltwch â ni dentalpublichealth@wales.nhs.uk

Bydd yr adroddiad nesaf yn cael ei gyhoeddi ym mis Ionawr 2023